

CE CHE LA GLESIE FURLANE E À SINTÛT DI SCUGNÎ DÎ SUBIT DOPO IL TARAMOT

Doi mêś dopo dal taremot no si viodevin lusorons di sorte. E alore, come ogni an, ma cun plui brame di simpri, i predis di Glesie Furlane cun a capo pre Checo Placereani e an dit: «tornin a Aquilee», là ch'o vin la scune e la lidrîs. Tornâ par cjapâ coragjo. Par cjatasi insieme come Glesie, par tratâ dai nestris problemas grancj cence fin.

Ai 11 di lui dal 1976, vée di Sant Ermacure e Furtunât, si à dade dongje une fulugne di int inte Basiliche Patriacjâl di Aquilee a ricuardâ i siei muârts e a viodi ce ch'al ere di fâ.

A erin però dome lis pioris. I pastôrs de Glesie furlane bons. Pieri Cocolin vescul di Gurisse, bons. Fredo Battisti vescul di Udin e bons Abram Freschi vescul di Cuncuardie-Pordenon, magari cussî no, no erin vignûts.

Dismîl e passe personis a jerin ladis a preâ te Basiliche di Aquilee indulà che àn savût che Rome ur veve dite ai vescui di no vignî a preâ cun lôr. Delit: a jerin e a preavin par furlan.

Chest il comunicât dai sfueis “La Vita Cattolica”, 17 luglio 1976, pag. 6 e “Voce Isontina” sul cantin:

«I Vescovi di Gorizia, Pordenone e Udine, attesi per la Concelebrazione della Messa nella Basilica di Aquileja domenica 11 u.s., con loro profondo dispiacere non hanno potuto parteciparvi perchè la Congregazione non ha consentito – neppure “una tantum” – la celebrazione in lingua friulana e perchè i promotori dell'incontro non hanno accettato la richiesta dei Vescovi di recitare il Canone in latino»

E chest il document di Glesie Furlane.

«A di chêi di Rome e ai lor gastalts ...»

Ai 11 di luj, vée di Sant Ermacure e Fortunât, protetôrs dal Friûl, la Glesie Furlane si da dongje te grande Basiliche di Aquilee pal avôt dal Friûl.

Se un popul al à cincuante mutîfs par cjatâsi insieme, chest an l'avôt al à un significât dal dut speciâl. O sin a doi mêś dal taramot ch'al à ruvinât la nestre tiere e copade la nestre int. Problemas and'è avuâl di chî: spirituâi e materiâi, di claps e di anime.

Par chest si scuen cjatâsi come furlans ch'a crodin. La fieste e jé une fieste furlane, nestre, di nô ch'o vin lis consequencis di chest flagjel.

I Furlans ch'a van lajù no an di mudâsi par preâ. E an di restâ ce ch'a son sot des tendis o tes barachis, cu la lôr muse, cu la lôr lenghe, cu la lôr anime. E jé l'uniche robe che nus a restade intate e che nus judarà a tornâ a meti in pins il nestri Friûl.

Se vegnin âtris di lôr, Slovens, Todescs o Talians, a vegnin par unîsi cun nô, ma la fieste e à di restâ nestre. E chest al vâl par ducj, ancje pai vescui di Gurisse, Udin e Cuncuardie.

Al samée, stant a ce che si sint atôr, che vetin riguârt di vignî par vie dal Cjanul de Messe, che no ur trai di dîlu par furlan, ch'al é improibît. Lôr a vegnin a pat che si prei par latin.

No savin ce che po pensà la int savint che i vescui, che an tant corût par jessi dongje dai furlans tes tendis, e an pore di fâsi viodi dongje dai furlans a preâ. E an pore che il pape

ur mandi il befel. Pensait! Un popul al é avilît, e nol sa a di ce sant avodâsi e i pastôrs, che varessin di jessi in teste, e an riguart a mostrâsi masse furlans.

No an pôre di nô. E an pôre di chêi di Rome. E chêi di Rome no ur intarresse che i Furlans, dopo de disgracie, a cirin di tignîsi su ancje preant. L'impuartant al é che no prein par furlan, se no si crée la division, si romp la comunion. Ce strambe cheste comunion che si creve atôr dal altâr, fat par judâ la comunion.

Ma ce vuelino chêi di Rome?

Leint la nestre storie, al ven di pensâ se nus à cunvignût stâ cun lôr o se invessit nol ere miei butâsi di cheâtre bande, come ch'o vevin sinpri stât! La Glesie di Aquilée e à scomençât a lâ in rotis cun Rome inmò dal cincent, cul Sisma dai Tre Cjapitui. O vin tignût dûr plui ch'o vin podût: par un secul e mieç. Dopo o vin tornât a rapeçâ la union. Inte ete di mieç, cuanche in Lombardie a lavin atôr cul cjaruç, i nestris patriarcjs a erin ducj ghibelins, vadî de bande dal inperadôr e cuintri dal pape. Par cheste fedeltât, Rico IV, che il pape Grivôr VII al veve fat lâ discolç fint a Cjanosse, j dè a Sigjeart di Aquilée il titul di duce dal Friûl. Ducj lu vevin bandonât par stâ cul pape. Dome lui j ere restât fedêl.

Intant la glesie di Rome, cun befêl, conseis e bolis, e veve cjapât pît pardut. Il pape al ere rivât a montâ a sacule di ducj i res e imperadôrs dal mont e, stant lassù, al tajave e al cusive cemût che j pocave, sinpri a glorie di Diu a pal ben de Glesie. I studiâts di Rome a inventarin un slac di regulis par spiegâ che la Glesie no lave indenant se il Pape nol veve la cjaçe in man.

I vescui a ripeteven ce ch'al contave il pape e i predis ce ch'a contavin i vescui. La biade int a sintî e a tasê. Si sa che, a fuarce di parâ ju, si slagje il bugjel. Nol ere content il pape di jessi parsore di ducj; j coventave che nissun no j fases ombre. Pa la cuâl, ai sis di luj dal 1751 Benedet XIV, no si sa cun ce podê, al à disfate la Glesie di Aquilée, ridusint la basiliche patriarcjaal a capelanie, cence nancje il batim. E dut pal ben des animis! Ce ch'al é sucedût dopo, lu san ancje i claps. Chêi ch'a erin passâts protestants, a continuavin a meti in pins la loro nasion; i catolics a diventavin simpri plui flaps. I popui puars ducj ur metevin il pît sul cuel. Il pape al tirave fur la provedense.

Il popul furlan, sotan tal cuarp e ta l'anime al à cirût di tignî dûr plui ch'al à podût, te so filusumie. Si é salvât parcheche, sotvie, no ur à mai crodût masse. Cumò che la int a à cjapât cussience de so gjenuinitât, che ancje il Stât Talian, cun dut ch'al é malamentri, al scuen ricognossinus come etnie, o vin di vê chei cuatri macacos di Rome che no vuelin sintî di che bande.

E an cirût, in tancj, di puartâ indenant il problema de lenghe furlane. Cul Consei Vatican Secont, ch'al dis che ognidun al à dirit di doprâ la so lenghe, ancje chêi dal Madagascâr, si crodeve che fos finide cheste coloniasion glesiastiche. Sì, lafé'! Pjês di prime! A Rome e an dit ch'a spietin une documentasion par viodi se puedin dânus il permes.

E nô o spietin la lôr documentasion, se puedin inproibînus!

Parcheche se chêi di Rome a tirin fûr lis lor leçs disonestis, nô ur tirin fûr la leç naturâl, che la doprin ancje lôr, cuanche son sot e che la dinein cunache son parsore! Il Vatican al pratint libertât pai catolics cunache son sot dai comuniscj, ma cuanch'al comande lui, no ju lasse libars un sior no.

Che une volte il pape al ves l'anbision di comandâ a bachete ancje là che nol podeve, si po ancje ametilu, cu la scuse ch'a erin âtris timps, ma cumò che i timps a son ganbiâts, che res e inperadôrs a son lâts a mangjâ il lidric pal poc, la pulitiche glesiastiche romane e jé sinmpri compagne. Come se la libertât che i omps si an cuistade cu lis rivolusions e cul sanc e fos robe de lune e no de tiere. No si son nacuarzûts che il mont al va indenat e

che il «Dictatus Papae» al fas ridi? Ce ur covential par capîle? Un taramot piês dal nestri?

Nol sares nancje di cjapâse cul pape, parceche si sa che cuant che un al rive a sentâsi sun chel cjadreòn, lu tirin atôr cemût che vuelin (Zuan, 21, 18) però al é lui ch'al rapresente dute la gubie e ancje lui, prin di jessi pape, al ere dentri in tal scjap!

Cuant ch'al é vignût a Udin, nol à dit (o no j an lassât dí) nancje «Bundì», e in te semblée dai predis j vin dit ch'al ere stât cence creance. Cun dut chest, no si rint ancjemò no. Doi dîs dopo il taramot al à mandât su un gardenâl ch'al à vût indiment dome di frontiere e di union e di volâsi bon e di no fâ vueris, come se j vessin metût une bombe sot de machigne e ch'o fossin ducj bandîts.

Ce j domandîno? Che nus lassi stâ come ch'o sin e che nus rispjeti cemût che o sin. No dinein nissune veretât di fede e nacje no j tirin vie il scagn. Però no sapuartin ch'al vegni a dînus che par jessi cristians no vin di restâ furlans ancje in glesie. Chel po no! Se cheste e jé la so comunion, une comunion fondade su la prepotense, che se tegni. Al sarà ce che Diu vorà.

E ancje i vescui, ch'a sielgin une volte par sinpri se an di jessi paris dal nestri popul par riscjâ cun lui o prefets mandâts a controlâ.

Daûr ch'a sielgin, cui fats, o savarin cemût conpuartâsi cun lôr.

Ch'a sepin però, che no puedin continuâ a zujâ!

Aquilée, ai 10 di luj dal 1976

Chêi de Glesie Furlane